

四庫全書

子部

欽定四庫全書

巢氏諸病源候總論卷五

隋 巢元方 撰

腰背痛諸候 凡十論

腰痛候

腎主腰脚腎經虛損風冷乘之故腰痛也又邪客於足少陰之絡令人腰痛引少腹不可以仰息診其尺脉沈主腰背痛寸口脉弱腰背痛尺寸俱浮直下此為督脉

腰強痛

凡腰痛病有五。一曰少陰少陰腎也。十月萬物陽氣傷。是以腰痛。二曰風痺風寒著腰。是以痛。三曰腎虛役用傷腎。是以痛。四曰腎腰墜墮傷腰。是以痛。五曰寢卧濕地。是以痛。其湯熨針石別有正方。補養宣導。今附於後。養生方云。飯了勿即卧。久成氣病。令腰疼痛。又曰大便勿強努。令人腰疼目澀。又云笑多即腎轉腰痛。

又云人汗次勿企牀懸脚久成血痺兩足重及腰痛
養生方導引法云一手向上極勢手掌四方轉迴一手
向下努之合手掌努指側身欹形轉身向似看手掌向
上心氣向下散適知氣下緣上始極勢左右上下四七
亦然去髀并肋腰脊疼悶

又云平跪長伸兩手拓席向前待腰脊須轉遍身骨解
氣散長引腰極勢然始却跪便急如似脊內冷氣出許
令臂搏痛痛欲似悶痛還坐來去二七去五臟不和背

痛悶

又云凡人常須覺脊強不問時節縮咽轉內似迴搏內
似面努搏并向上也頭左右兩向按之左右三七一住
待血行氣動定然始更用初緩後急若無病人常欲得
旦起午時日沒三辰如用辰別三七除寒熱脊腰頸痛
又云舒兩足足指努上兩手長舒手掌相向手指直舒
仰頭努脊一時極勢滿三通動足相向一尺手不移處
手掌向外七通更動足二尺手向下拓席極勢三通去

遍身內筋脉虛勞骨髓疼悶長舒兩足身角上兩手提
兩足指急搦心不用力心氣并在足下手足一時努縱
極勢三七去踰臂腰疼解豁足氣日日漸損

又云凡學將息人先須正坐膝頭足初坐先足指指相
對足跟外扒坐上少欲安穩須兩足跟向內相對坐上
足指扣覺悶疼漸漸舉身似款便兩足上待共坐相似
不痛始雙豎足跟而上足指并反而向外每坐常學去
膀胱內冷面冷風膝冷足疼上氣腰疼盡自消適也

腰痛不得俛仰候

腎主腰脚而三陰三陽十二經八脉有貫腎絡於腰脊者勞損於腎動傷經絡又為風冷所侵血氣擊搏故腰痛也陽病者不能俛陰病者不能仰陰陽俱受邪氣者故令腰痛而不能俛仰

又云伸兩脚兩手著足五指上愈腰折不能低著唾血久疼愈

又云長伸兩脚以兩手提五指七通愈折腰不能低仰

也

風濕腰痛候

勞傷腎氣經絡既虛或因卧濕當風而風濕乘虛搏於腎腎經與血氣相擊而腰痛故云風濕腰痛

卒腰痛候

夫勞傷之人腎氣虛損而腎主腰脚其經貫腎絡脊風邪乘虛卒入腎經故卒然而患腰痛

久腰痛候

夫腰痛皆由傷腎氣所為腎虛受於風邪風邪停

缺

邪氣客於足少陽之絡令人脇痛欬汗出陰氣擊於肝寒氣客於脉中則血泣脉急引脇與小腹診其脉絃而急脇下如刀刺狀如飛尸至困不死左手脉大右手脉小病右脇下痛寸口脉雙絃則脇下拘急其人漉漉而寒其湯熨針石別有正方補養宣導今附於後

養生方導引法云卒左脇痛念肝為青龍左目中魂神將五營兵千乘萬騎從甲寅直符吏入左脇下取病去

又云右脇痛念肺為白帝右目中魄神將五營兵千乘萬騎甲申直符吏入右脇下取病去脇側卧伸臂直脚以鼻內氣以口出之除脇皮膚痛七息止

又云端坐生腰右顧視月口內氣咽之三十除左脇痛
開目

又云舉手交項上相握自極治脇下痛坐地交兩手著不周遍握當挽久行實身如金剛令息調長如風雲如雷

消渴病諸候 凡八論

卷五

消渴候

夫消渴者渴不止小便多是也由少服五石諸丸散積
經年歲石勢結於腎中使人下焦虛熱及至年衰血氣
減少不復能制於石石勢獨盛則腎為之燥故引水而
不小便也其病變多發癰疽此坐熱氣留於經絡不引
血氣壅澀故成癰膿診其脉數大者生細小浮者死又
沈小者生實牢大者死有病口甘者名為何何以得之

此五氣之溢也名曰脾癰夫五味入於口藏於胃脾為之行其精氣溢在脾令人口甘此肥美之所發此人必數食甘美而多肥令人內熱甘者令人滿故其氣上溢為消渴厥陰之病消渴重心中疼飢而不欲食甚則欲吐虺

養生法云人睡卧勿張口久成消渴及失血色赤松子云卧閉目不息十二通治飲食不消其湯熨針石別有正方補養宣導今附於後

法云解衣悵卧伸腰瞋少腹五息止引腎去消渴利陰陽解衣者使無罣礙悵卧者無外想使氣易行伸腰使腎無逼蹙瞋者大努使氣滿小腹者即臍腹牽氣使上息即為之引腎者引水來咽喉潤上部去消渴枯槁病利陰陽者饒氣力此中數虛要與時節而為避初食後大飢時此二時不得導引傷人亦避惡日時節不和時亦避導已先行一百二十步多者千步然後食之法不使大冷大熱五味調和陳穢宿食蟲蝟餘殘不得食少

眇著口中數嚼少喘咽食已亦勿眠此名穀藥并與氣和即真良藥

渴病候

五臟六腑皆有津液若臟腑因虛實而生熱者熱氣在內則津液竭少故渴也夫渴數飲其人必眩背寒而嘔者因利虛故也診其脉心脉滑甚為善渴其久病變成發癰疽或成水疾

大渴後虛乏候

夫人渴病者皆由臟腑不和經絡虛竭所為故病雖瘥血氣未復仍虛乏也

渴利候

渴利者隨飲小便故也由少時服乳石石熱盛時房室過度致令腎氣虛耗下焦生熱熱則腎燥燥則渴腎虛又不得傳制水液故隨飲小便以其病變多發癰疽以其內熱小便利故也小便利則津液竭津液竭則經絡澀經絡澀則榮衛不行榮衛不行則由熱氣留滯故成

癰疽膿

渴利損後候

夫渴利病後榮衛虛損臟腑之氣未和故須各宣暢也

渴利後發瘡候

渴利之病隨飲小便也此謂服石藥之人房室過度腎氣虛耗故也下焦生熱熱則腎燥腎燥則渴然腎虛人不能制水故小便利其渴利雖瘥熱猶未盡發於皮膚皮膚先有風濕濕熱相搏所以生瘡


內消候

內消病者不渴而小便多是也由少服五石石熱結於
腎內也熱之所作所以服石之人小便利者石性歸腎
腎得石則石石則消水漿故利利多不得潤養五臟臟
衰則生諸病由腎盛之時不惜其氣恣意快情致使虛
耗石熱孤盛則作消利故不渴而小便多

強中候

強中病者莖長興盛不痿精液自出是由少服五石五

石熱住於腎中下焦虛少壯之時血氣尚豐能制於五
石及至年衰血氣減少腎氣不復能制精液若精液竭
則諸病生矣



巢氏諸病源候總論卷五

欽定四庫全書

子部

巢氏諸病源候總論卷六

七

詳校官八醫院醫官臣姜晟

編修臣倉聖脈覆勘

總校官庶吉士臣何思鈞

校對官中書臣吳俊

謄錄舉人臣楊兆豐

欽定四庫全書

巢氏諸病源候總論卷六

隋巢元方撰

解散病諸候

凡二十六論

寒食散發候

夫散脉或洪實或斷絕不足欲似死脉或細數或弦駛坐所犯非一故也脉無常投醫不能識熱多則弦駛有癖則洪實急痛則斷絕凡寒食藥率如是無苦非死候

也勤從節度不從節度則死矣欲服散宜診脉候審正其候爾乃畢愈脉沈數者難發難發當數下之脉浮大者易發也人有服散兩三劑不發者此人脉沈難發發不令人覺藥勢行已藥但於內發不出形於外欲候知其得力人進食多是一候氣下顏色和悅是二候頭面身癢瘙是三候策策惡風是四候厭厭欲寐是五候也諸有此證候者皆藥內發五臟不形出於外但如方法服散勿疑但數下之則內虛自當發也諸方互有不同

皇甫唯欲將冷廩丘公欲得暖將之意其多有情致也
世人未能得其深趣故鮮能用之然其方法猶多不盡
但論服藥之始將息之度不言發動之後治解之宜多
有闕畧江左有道弘道人深識法體凡所救療妙驗若
神製解散對治方云鍾乳對朮又對枯萐其治主肺上
通頭胃朮動鍾乳胃塞短氣鍾乳動朮頭痛目疼又鍾
乳雖不對海蛤海蛤動則目痛短氣有時朮動鍾乳直
頭痛胃塞然鍾乳與朮所可為患不過此也雖所患

不同其治亦一矣發動之始要其有始由覺體中有異與上患相應便速服葱白豉湯又云硫黃對防風又對細辛其治主脾腎通腰脚防風動硫黃煩疼腰痛或瞋忿無常或下利不禁防風細辛能動硫黃硫黃不能動彼始覺發便服杜仲湯白石英對附子其治主胃通至脾腎附子動白石英煩滿腹脹白石英動附子則嘔逆不得食或口噤不開或言語難手脚疼痛覺發服生麥門冬湯紫石英對人參其治主心肝通至腎脚人參動紫

石英心急而痛或驚悸不得眠卧或恍惚忘誤失性狂
發或黯黯欲眠或憤憤喜瞋或瘥或劇乍寒乍熱或耳
聾目暗又防風雖不對紫石而能動紫石紫石由防風
而動人參人參動亦心痛煩熱頭項強始覺便宜服麻
黃湯赤石脂對桔梗其治主心通至胷背桔梗動赤石
心痛口噤手足逆冷心中煩悶赤石動桔梗頭痛目赤
身體壯熱始覺發即溫酒飲之隨能數杯酒勢行則解
亦可服大麥麴良復若不解復服朮對鍾乳朮發則頭

痛目赤或舉身壯熱解與鍾乳同附子對白石英亦對
赤石脂附子發則嘔逆手脚疼體強骨節痛或項強面
目滿腫飲酒食麩自愈若不愈與白石英同解人參對
紫石英人參發則煩熱頭項強解與紫石英同桔梗對
赤石脂又對茯苓又對牡蠣桔梗發則頭痛目赤身體
壯熱解與赤石同乾薑無所偏對

有說者云藥性草木則速發而易歇土石則遲發而難
歇也夫服藥草石俱下於喉其勢厲盛衰皆有先後其

始得效皆是草木先盛耳土石方引日月也草木少時便歇石勢猶自未成其病者不解消息便謂頓休續後更服或謂病痼藥微倍更增石或更雜服衆石非一也石之為性其精華之氣則合五行乃益五臟其滓穢便同灰土也夫病家氣血虛少不能宣通雜石之性卒相和合更相塵瘀便成牢積其病身不知是石也如精華不發不能致熱消疾便謂是冷盛牢劇服之無已不知石之為體體冷性熱其精華氣性不發其冷如冰而疾

者其石入腹即熱既不即熱服之彌多是以患冷癖之人不敢寒食而大服石石數彌多其冷癖尤劇皆石性不發而積也亦有雜餌諸石丸酒單服異石初不息唯以大散為數而已有此諸害其證甚多小品方云道弘道人製解散對治方說草石相對之和有的能發動為證世人逐易不逆思尋古今方說至於動散臨急便就服之既不救疾便成委禍大散由來是難將之藥夫以大散難將而未經服者乃前有慎耳既心期得益苟就

服之已服之人便應研習救解之宜異日動之便得自
救也夫身有五石之藥而門內無解救之人輕信對治
新方逐易服之從非棄是不當枉命誤藥邪檢神農本
草經說草石性味無對治之和無指的發動之說按其
對治之和亦依本草之說耳且大散方說主患注藥物
不說其所主治亦不說對和指的發動之性也覽皇甫
士安撰解散說及將服消息節度亦無對和的發之說
也復有廩丘家將溫法以救變敗之色亦無對和的動

之說若以藥性相對為神者枯薑惡乾薑此是對之大
害者道弘說對治而不辨此道弘之方焉可從乎今不
從也當從皇甫節度自更改枯薑便為良矣患熱則不
服其藥惟患冷者服之耳自可以除枯薑若虛勞脚弱
者以石斛十分代枯薑若風冷上氣欬者當以紫苑十
分代枯薑二法極良若雜患常疾者止除枯薑而已慎
勿加餘物皇甫云然寒食藥者世莫知焉或言華佗或
曰仲景考之於實佗之精微方類單省而仲景經有侯

氏黑散紫石英方皆數種相出入節度畧同然則寒食
草石二方出自仲景非佗也且佗之為治或剝斷腸胃
滌洗五臟不純任方也仲景雖精不及於佗至於審方
物之候論草石之宜亦妙絕衆醫及寒食之療者御之
至難將之甚苦近世尚書何晏耽聲好色始服此藥心
加開朗體力轉強京師翕然傳以相授歷歲之困皆不
終朝而愈衆人喜於近利未覩後患晏死之後服者彌
繁于時不輟余亦豫焉或暴發不常天害年命是以族

弟長互舌縮入喉東海王良夫癰瘡陷背隴西辛長緒
皮肉爛潰蜀郡趙公烈中表六喪悉寒食散之

缺

遠者數十歲近者五六歲余雖視息猶溺人之笑耳而
世人之患病者由不能以斯為戒失節之人多來問余
乃喟然歎曰今之醫官精力不及華佗審治莫如仲景
而競服至難之藥以招甚苦之患其天死者焉可勝計
哉咸寧四年平陽太守劉泰亦沈斯病使使問余救解
之宜先時有姜子者以藥困絕余實生之是以聞焉然

身自荷毒雖才士不能書辨者不能說也苟思所不逮
暴至不旋踵敢以教人乎辭不獲已乃退而惟之求諸
本草考以素問尋故事之所更參氣物之相使并列四
方之本注釋其下集而與之匪曰我能也蓋三折臂者
為醫非生而知之試驗亦其次也服寒食散二兩為劑
分作三貼清旦溫醇酒服一貼移日一丈復服一貼移
日二丈復服一貼如此三貼盡須臾以寒水洗手足藥
氣兩行者當小痺便因脫衣以冷水極浴藥勢益行周

體涼了心意開朗所患即瘥雖羸困著床皆不終日而愈人有強弱有耐藥若人羸弱者可先小食乃服若人強者不須食也有至三劑藥不行者病人有宿癖者不可便服也當先服消石大丸下去乃可服之服藥之後宜煩勞若羸著床不能行者扶起行之常當寒衣寒飲寒食寒卧極寒益善若藥未散者不可浴浴之則矜寒使藥噤不發令人戰掉當更溫酒飲食起跳踴春磨出力令溫乃浴解則止勿過多也又當數冷食無晝夜也

一日可六七食若失食飢亦令人寒但食則溫矣若老
小不耐藥者可減二兩强者過二兩少小氣盛及產婦
卧不起頭不去巾帽厚衣對火者服散之後更去衣巾
將冷如法勿疑也虛人亦治又與此藥相宜實人勿服
也藥雖良令人氣力兼倍然甚難將息適大要在能善
消息節度專心候察不可失意當絕人事唯病著牀虛
所不能言厭病者精意能盡藥意者乃可服耳小病不
能自勞者必廢失節度慎勿服也若大傷寒者下後乃

服之便極飲冷水若產婦中風寒身體強痛不得動搖者便溫服一劑因以寒水浴即瘥以浴後身有痺處者便以寒水洗使周徧初得小冷當數食飲酒於意後憤憤不了快者當復冷水浴甚者水畧不去體也若藥偏在一處偏痛偏冷偏熱痺及眩煩腹滿者便以水逐洗於水下即了矣如此晝夜洗藥力盡乃止凡服此藥不令人吐下也病皆愈若膈上大滿欲吐者便哺食即安矣服藥之後大便秘變於常故小青黑色是藥染耳

勿恠之也若亦溫溫欲吐當遂吐之不令極也明旦當更服若浴晚者藥勢必不行則不堪冷浴不可強也當如法更服之凡洗太早則藥禁寒太晚則吐亂不可失過也寒則出力洗吐則速冷食若不飢為寒者食自溫常當將冷不可熱灸之也若溫衣溫食溫卧則吐逆顛覆矣但冷飲食冷浴則瘥矣凡服藥者服食皆冷唯酒冷熱自從或一日而解或二十餘日解常飲酒令體中醺醺不絕當飲醇酒勿飲薄白酒也體內重令人變亂

若不發者要當先下乃服之也寒食藥得節度者一月轉解或二十日解堪溫不堪寒即以解之候也其失節度者頭痛欲裂坐服藥食溫作癖急宜下之或兩目欲脫坐犯熱在肝速下之將冷自止或腰痛欲斃坐衣厚體溫以冷洗浴冷石熨也或眩暈欲蹶坐衣裳犯熱宜科頭冷洗之或腰疼欲折坐久坐下溫宜常令牀上冷水洗也或腹脹欲決甚者斷衣帶坐寢處久下熱又得溫失食失洗不起行但冷食冷洗當風立或心痛如刺

坐當食而不食當洗而不洗寒熱相結氣不通結在心
中口不得息當校口但與熱酒任本性多少其令酒氣
兩得行氣自通得噫因以冷水澆淹手巾著所苦處溫
復易之自解解便速冷食能多益善於諸痛之內心痛
最急救之若赴湯火乃可濟耳或有氣斷絕不知人時
蹶口不得開病者不自知當須傍人救之要以熱酒為
性命之本不得下者當斷齒以酒灌咽中咽中穴逆酒
入腹還出者但與勿止也出復內之如此或半日酒下

氣蘇酒不下者便殺人也或下利如寒中坐行止食飲
飲犯熱所致人多疑冷病人又滯痺皆犯熱所為慎勿
疑也速脫衣冷食飲冷洗也或百節痠疼坐卧太厚又
入溫被中衣溫不脫衣故也卧下當極薄單布不著絛
也當薄且垢故勿著新衣多著故也雖冬寒常當被頭
受風以冷石熨衣帶不得繫也若犯此痠悶者但入冷
水浴勿忍病而畏浴也或矜戰患寒如傷寒或發熱如
瘧坐食忍飢洗冷不行便坐食臭故也急冷洗起行或

惡食如臭物坐溫衣作癖也當急下之若不下萬救終
不瘥也或咽中痛鼻塞清涕出坐溫衣近火故也但脫
衣冷水洗當風以冷石熨咽類五六徧自瘥或胃脇氣
逆乾嘔坐飢而不食藥氣熏膈故也但冷食冷飲冷洗
即瘥或食下便出不得安坐有癖但下之或淋不得小
便久坐溫及騎馬鞍熱入膀胱也冷食以冷水洗小腹
以冷石熨一日即止或大行難腹中牢固如蛇盤坐犯
溫久積腹中乾糞不去故也消酥若膏便寒服一二升

浸潤則下不下更服即瘥或寒慄頭掉不自支任坐食
少藥氣行於肌膚五臟失守百脉搖動與氣爭競故也
努力強飲熱酒以和其脉強冷令冷飲以定其臟強起
行以調其關節酒行食充關機以調則洗了矣云了者
是瑟然病除神明了然之狀也或關節強直不可屈伸
坐久停息不息煩勞藥氣停止絡結不敢越沈滯於血
中故也住力自溫便冷洗即瘥云在力自溫者令行動
出力從勞則發溫也非厚衣近火之溫也或小便稠數

坐熱食及噉諸含熱物餅黍之屬故也以冷水洗少腹
服梔子湯即瘥或失氣不可禁坐犯溫不時洗故也冷
洗自寒即止或遺糞不自覺坐久坐下溫熱氣上入胃
少腹不禁故也冷洗即瘥或目痛如刺坐熱熱氣衝肝
上奔兩眼故也勤冷食清旦溫小便洗不過三即瘥或
耳鳴如風聲汁出坐自勞出力過度房室不節氣迸奔
耳故也勤好飲食稍稍行步數食節情即止或口傷舌
強爛燥不得食少穀氣不足藥在胃脘中故也急作梔

子歧湯或手足偏痛諸節解身體發癰瘡靨結坐寢處
久不自移從暴熱偏併聚在一處或靨結核痛甚者發
如癰覺便以冷水洗冷石熨微者食頃散也劇者數日
水不絕乃差洗之無限要瘡為期若不瘡即取磨刀
石水燒令熱赤以石投苦酒中石入苦酒皆破裂因擣
以汁和塗癰上三即瘡取糞中大蟻螬擣令熟以塗癰
上亦不過三再即瘡尤良或飲酒不解食不復下乍寒
乍熱不洗便熱洗復寒甚者數十日輕者數日晝夜不

得寐愁憂恚怒自驚跳悸恐恍惚忘誤者坐犯溫積久
寢處失節食熱作癖內實使熱與藥并行寒熱交爭雖
以法救之終不可解也吾嘗如此對食垂涕援刀欲自
刺未及得施賴家親見迫奪故事不行退而自佳乃強
食冷飲水遂止禍不成若絲髮矣凡有寒食散藥者雖
素聰明發皆頑囂告捨難愈也以此死者不可勝計急
飲三黃湯下之當吾之困也舉家知親皆以見分刺賴
亡兄士元披方得三黃湯方合使吾服大下即瘥自此

常以救急也。或脫衣便寒，著衣便熱，坐脫著之間無適，故小寒自可著，小溫便脫，即洗之，即慧矣。慎勿忍使病發也。洗可得了，然瘥忍之，則病成矣。或齒腫，脣爛，齒牙搖痛，頰車噤坐，犯熱不時救，故也。當風張口，使冷氣入，咽漱寒水，即瘥。或周體患腫，不能自轉徙，坐久停息，久不飲酒，藥氣沈在皮膚之內，血脈不通，故也。飲酒冷洗，自勞行，即瘥。極不能行，使人扶或車行之事，寧違意，勿聽從之。使支節柔調，乃止。勿令過差，過則使極，更為失。

度熱者復洗也或患冷食不可下坐久冷食食口中不知味故也可作白酒麋益著酥熱食一兩頓悶者冷飲還冷食或陰囊臭爛坐席厚下熱故也坐冷水中即瘥或腳趾間生瘡坐著履溫故也脫履著屐以冷水洗足即愈或兩腋下爛作瘡坐臂脇相親也以物懸手離脇冷熨之即瘥或嗜寐不能自覺久坐熱悶故也急起洗浴飲冷自精了或有癖也當候所宜下之或夜不得眠坐食少熱在內故也當服梔子湯數進冷食或咳逆咽

中傷清血出坐卧温故也或食温故也飲冷水冷熨咽
外也或得傷寒或得温瘧坐犯熱所為也凡常服寒食
散雖以久解而更病者要先以寒食救之終不中冷也
若得傷寒及温瘧者卒可以常藥治之無咎也但不當
飲熱藥耳傷寒藥皆除熱瘧藥皆除癖不與寒食相妨
故可服也或藥發輒并卧不以語人坐熱氣盛食少穀
不充邪干正性故也飲熱酒冷食自勞便佳或寒熱累
月張口大呼眼視高精候不與人相當日用水百餘石

澆不解者坐不能自勞又飲冷酒復食溫食譬如喝人心下更寒以冷救之愈劇者氣結成冰得熱熨飲則冰銷氣通喝人乃解令藥熱聚心乃更寒戰亦如喝人之類也速與熱酒寒解氣通酒兩行於四肢周體悉溫然後以冷水三斗洗之慄然了了矣河東裴季彥服藥失度而處三公之尊人不敢強所欲已錯之後其不能自知左右人不解救之之法但飲冷水以水洗之用水數百石寒遂甚命絕於水中良可痛也夫以十石焦炭

二百石水沃之則炭滅矣藥熱雖甚未如十石之火也沃之不已寒足殺人何怨於藥乎不可不曉此意世人失救者例多如此欲服此藥者不唯已自知也家人皆宜習之使熟解其法乃可用相救也吾每一發氣絕不知人雖復自知有方力不復施也如此之弊歲有八九幸家人大小以法救之猶時有小違錯況都不知者哉或大便稠數坐久失節度將死候也如此難治矣為可與湯下之儻十得一生耳不與湯必死莫畏不與也下

已致死令不恨也或人困已而脉不絕坐藥氣盛行於百脉人之真氣已盡唯有藥氣尚自獨行故不絕非生氣也或死之後體故溫如人肌腹中雷鳴顏色不變一兩日乃似死人耳或灸之尋死或不死坐藥氣有輕重故有死生雖灸得生生非已疾之法終當作禍宜慎之大有此故也或服藥心中亂坐服溫藥與疾爭結故也法當大吐下若不吐下當死若不吐死者冷飲自了然瘥或偏臂脚急痛生久藉持卧溫不自轉移熱氣入肌

附骨故也勤以布冷水淹搗之溫復易之或肌皮鞣如木石枯不可得屈伸坐食熱卧溫作痺久不下五臟膈閉血脉不周通故也但下之冷食飲酒自勞行即瘥或四肢面目皆浮腫坐食飲溫又不自勞藥與正氣停并故也飲熱酒冷食自勞冷洗之則瘥或瞑無所見坐飲食居處溫故也脫衣自洗但冷飲食須臾自明了或鼻中作蝦雞子臭坐著衣溫故也脫衣冷洗即瘥或身皮楚痛轉移不在一處如風坐犯熱所為非得風也冷洗

熨之即瘥或脚疼欲折由久坐下溫宜坐單牀上以冷水洗即愈或苦頭眩目疼不用食由食及犯熱心膈有癖故也可下之或臂脚偏急苦痛者由久坐卧席溫下熱不自轉移氣入脾胃脾骨故也勤以手巾淹冷水迫之溫則易之如此不過兩日即瘥凡治寒食藥者雖治得瘥師終不可以治為恩非得治人後忘得効也昔如文摯治齊王病先使王怒而後病已文摯以是雖愈王病而終為王所殺今救寒食者要當逆常理反正性成

犯怒之自非達者得瘥之後心念犯怒之怨不必得治之思猶齊王殺文摯也后與太子不能救況於凡人哉然死生大事也如知可生而不救之非仁者也唯仁者心不已必冒犯怒而治之為親戚之故不但其人而已凡此諸救皆吾所親更也試之不借問於他人也要當違人理反常性重衣更寒一反也飢則生臭二反也極則自勞三反也溫則滯利四反也飲食欲寒五反也癰瘡水洗六反也當洗勿失時一急也當食勿忍飢二急

也酒必淳清令溫三急也衣溫便脫四急也食必極冷
五急也卧必衣薄六急也食不厭多七急也冬寒欲火
一不可也飲食欲熱二不可也當疹自疑三不可也畏
避風涼四不可也極不能行五不可也飲食畏多六不
可也居貧厚席七不可也所欲從意八不可也務違常
理一無疑也委心棄本二無疑也寢處必寒三無疑也
解散痰癖候

服散而飲過度將適失宜衣厚食溫則飲結成痰癖其

狀痰多則胃膈否滿頭眩痛癰結則心脇結急是也

解散除熱候

夫服散之人覺熱則洗覺飢則食若洗食不時失其節度令石勢壅結否塞不解而生熱故須以藥除之

解散浮腫候

服散而浮腫者由食飲溫而久不自勞藥勢與血氣相并使氣壅在肌膚不得宣散故令浮腫或外有風濕內有停水皆與散勢相搏致令煩熱而氣壅滯亦令浮腫

若食飲溫不自勞而腫者但煩熱虛腫而已其風濕停水而已者則心腫而煩熱或小便澁而腫

解散渴候

夫服石之人石勢歸於腎而勢衝腑臟腑臟既熱津液渴燥腎惡燥故渴而引飲也

解散上氣候

服散將適失所取溫太過熱搏榮衛而氣逆上其狀胃滿短氣是也

解散心腹痛心噤候

膈間有寒胃脘有熱寒熱相搏氣逆攻腹乘心故心腹痛其寒氣盛勝於熱氣榮衛祕澀不通寒氣內結於心故心腹痛而心噤寒也其狀心腹痛而戰禁不能言語是也

解散大便秘難候

將適失宜犯溫過度散勢不宣熱氣積在腸胃故大便秘難也

解散虛冷小便多候

將適失度熱在上焦下焦虛冷冷氣乘於胞故胞冷不能制於小便則小便多

解散大便血脈

將適失度或取熱或傷冷觸動於石冷熱交擊俱乘於血致動血氣血滲入於大腸腸虛則泄故大便血

解散卒下利候

行止違節飲食失度犯觸解散而腸胃虛弱故卒然下

利也

解散下利後諸病候

服散而飲食失度居處違節或霍亂或傷寒或服藥而
下利利雖斷而血氣不調石勢因動致生諸病其狀或
手足煩熱或口噤或嘔逆之類是也隨其病證而解之
解散大小便難候

積服散散勢盛在內熱氣乘於大小腸大小腸否澀故
大小便難也

解散小便不通候

夫服散石者石勢歸於腎而内生熱熱結小腸胞內否
澀故小便不通

解散熱淋候

夫服散石石勢歸於腎若腎氣宿虛者今因石熱而又
將適失度虛熱相搏熱乘於腎腎主水水行小腸入胞
為小便腎虛則小便數熱結則小便澀澀則莖內痛故
淋瀝不快也

解散發黃候

飲酒內熱因服石石勢又熱熱搏脾胃脾胃主土其色黃而候於肌肉積熱蘊結蒸發於肌膚故成黃也

解散脚熱腰痛候

腎主腰脚服石熱歸於腎若將適失度發動石熱氣乘腰脚石與血氣相擊故脚熱腰痛也其狀脚熱煩而腰攣痛

解散鼻塞候

石發則將冷其熱盡之候冷氣不退者冷乘於肺肺主氣開竅於鼻其冷滯結不宣通故鼻塞

解散發瘡候

將適失宜外有風邪內有積熱熱乘於血血氣壅滯故使生瘡

解散癰腫候

六腑不和而成癰夫服散之人若將適失宜散動熱氣內乘六腑六腑血氣行於經脉經脉為熱所搏而外有

風邪乘之則石熱癰結血氣否澀而成癰腫

解散煩悶候

將適失宜冷熱相搏石勢不宣化熱氣乘於臟故令煩悶也

解散嘔逆候

將適失宜脾胃虛弱者石勢結滯乘於脾胃致令脾胃氣不和不勝於穀故氣逆而嘔調之即愈

解散目無所見目疼候

將適失宜飲食乖度膈内生痰熱痰熱之氣熏肝肝候目故目無所見而疼痛

解散心腹脹滿候

居處犯溫致令石勢不宣內壅腑臟與氣相搏故心腹脹滿

解散挾風勞候

本患風勞而服散石風勞未盡石勢固發解石之後體尚虛羸故猶挾風勞也

解散飲酒發熱候

服散而積飲酒石因酒勢而盛敷散經絡故煩而發熱也

巢氏諸病源候總論卷六

欽定四庫全書

巢氏諸病源候總論卷七

隋 巢元方 撰

傷寒病諸候 凡三十三論

傷寒候

經言春氣溫和夏氣暑熱秋氣清涼冬氣冰寒此則四時正氣之序也冬時嚴寒萬類深藏君子固密則不傷於寒夫觸冒之者乃為傷耳其傷於四時之氣皆能為

病而以傷寒為毒者以其最為殺厲之氣也即病者為傷寒不即病者其寒毒藏於肌骨中至春變為溫病夏變為暑病暑病者熱重於溫也是以辛苦之人春夏必有溫病者皆由其冬時觸冒之所致非時行之氣也其時行者是春時應暖而反寒夏時應熱而反冷秋時應涼而反熱冬時應寒而反溫非其時而有其氣是以一歲之中病無少長多相似者此則時行之氣也夫傷寒病者起自風寒入於腠理與精氣交爭榮衛否隔周行

不通病一日至二日氣在孔竅皮膚之間故病者頭痛
惡寒腰背強重此邪氣在表洗浴發汗即愈病三日以
上氣浮在上部胸心填塞故頭痛胸中滿悶當吐之則
愈病五日以上氣深結在臟故腹脹身重骨節煩疼當
下之則愈夫熱病者皆傷寒之類也或愈或死皆以六
七日間其愈皆以十日以上何也巨陽者諸陽之屬也
其脉連於風府故為諸陽主氣人之傷於寒也故其為
病熱雖甚不死其兩感於寒而病者必死兩感於寒者

其脉應與其病形何如兩傷於寒者病一日則巨陽與少陰俱病則頭痛口乾煩滿二日則陽明與太陰俱病則腹滿身熱不食譫言三日則少陽與厥陰俱病則耳聾囊縮厥逆水漿不入則不知人六日而死夫五臟已傷六腑不通榮衛不行如是之後三日乃死何也陽明者十二經脉之長也其氣血盛故不知人三日其氣乃盡故死其不兩傷於寒者一日巨陽受之故頭項痛腰脊強二日陽明受之陽明主肉其脉夾鼻絡於目故身

熱而鼻乾不得卧也三日少陽受之少陽主骨其脉循
脇絡於耳故胸脇痛耳聾三陽經絡皆受病而未入通
於臟也故可汗而已四日太陰受之太陰脉布於胃絡
於嗌故腹滿而嗌乾五日少陰受之少陰脉貫腎絡肺
繫舌本故口熱舌乾而渴六日厥陰受之厥陰脉循陰
器而絡於肝故煩滿而囊縮此三陰三陽五臟六腑皆
病榮衛不行五臟不通則死矣其不兩感於寒者七日
巨陽病衰頭痛少愈八日陽明病衰身熱少愈九日少

陽病衰耳聾微聞十日太陰病衰腹不滿如故則思飲食十一日少陰病衰渴止舌乾已十二日厥陰病衰囊從少腹微下邪氣皆去病日已矣治之如何治之各通其臟脉病日衰其病未滿三日者可汗而已其病三日過者可泄之而已太陽病頭痛至七日已上並自當愈其經竟故也若欲作再經者當針補陽明使經不傳則愈矣相病之法視色聽聲觀病之所候脉要決豈不微乎脉洪大者有熱此傷寒病也夫傷寒脉洪浮秋佳春

成病寸口脉緊者傷寒頭痛脈來洪大傷寒病少陰病
惡寒拳而利手足四逆者不治其人吐利躁逆者死利
止而眩時時自冒者死四逆惡寒而拳其脉不至其人
不煩而躁者死病六日其息高者死傷寒熱盛脉浮大
者生沈小者死頭痛脉短濇者死浮滑者生未得汗脉
盛大者生細小者死診人瀼瀼大熱其脉細小者死不
治傷寒熱病脉盛躁不得汗者此陽之極十死不治未
得汗脉躁疾得汗生不得汗雖瘥頭痛脉反濇此為逆

不治脉浮而大易治細微為難治發汗若吐下者若亡
血無津液者而陰陽自和必愈夫下後發汗其大小便
不利此亡津液勿治其小便必自愈陽已虛尺中弱者
不可發其汗也咽乾者不可發其汗也傷寒病脉弦細
頭痛而發熱此為屬少陽少陽不可發汗發汗則譫語
為屬胃胃和則愈不和則煩而悸少陰病脉細沈而微
病在裏不可發其汗少陰病脉微亦不可發汗無陽故
也陽已虛尺中弱澀者復不可下太陽病發熱而惡寒

熱多而寒少脉微弱則無陽不可發其汗脉浮可發其汗發熱自汗出而不惡寒關上脉細數不可吐若諸四逆病厥者不可吐虛家亦然寒多熱少可吐者此謂痰多也治瘧亦如之頭項不强痛其脉微胸中痞塞衝喉咽不得息可吐之治傷寒欲下之切其脉牢牢實之脉或不能悉解宜摸視手掌澀澀汗濕者便可下矣若掌不下病雖宜下且當消息温暖身體都皆津液通掌亦自汗下之即了矣太陰之為病腹滿吐食不可下下之

益甚時腹自痛下之胸下結牢脉浮可發其汗陽明病
心下牢滿不可下下之遂利殺人不可不審不可脫爾
禍福正在於此太陽與少陽合病心下牢頭項強眩不
可下三陽并病腹滿身重大小便調其脉浮牢而數渴
欲飲水此不可下其湯熨針石別有正方補養宣導今
附於後

養生方導引法云端坐生腰徐以鼻內氣以右手持鼻
閉目吐氣治傷寒頭痛洗洗皆當以汗出為度

又云舉左手頓左足仰掌鼻內氣四十息之除身熱背
痛

傷寒發汗不解候

傷寒初一日至二日病在皮膚名為在表表者陽也法
宜發汗今發汗而不解者此是陽不受病陽受病者其
人身體疼痛發熱而惡寒勑嗇拘急脉洪大有此證候
則為病在表發汗則愈若但煩熱不惡寒身不疼痛此
為表不受病故雖強發其汗而不能解也

傷寒取吐候

傷寒大法四日病在胸膈當吐之愈有得病二三日便心胸煩悶此為毒氣已入有痰實者便宜取吐

中風傷寒候

中風傷寒之狀陽浮熱自發陰弱汗自出嗇嗇惡寒淅淅惡風噦噦發熱鼻鳴乾嘔此其候也太陽病中風以火劫發其汗邪風被火熱血氣流溢失常兩陽相熏灼其身發黃陽盛即欲衄虛則小便難陰陽俱虛竭身體

則枯燥但頭汗出齊頸而還腹滿微喘口乾咽爛或不
大便久則譫言甚者至噦手足躁擾尋衣摸牀小便利
者其人可治陽明中風口苦而咽乾腹滿微熱惡寒脉
浮若緊下之則腹滿小便難陽明病能食為中風不能
食為中寒少陽中風兩耳無聞目赤胸中滿而煩不可
吐之吐之則悸而驚太陰中風四肢煩疼其脉陽微陰
澀而長為欲愈少陰中風其脉陽微陰浮為欲愈厥陰
中風其脉微浮為欲愈不浮為未愈

傷寒一日候

傷寒一日太陽受病太陽者膀胱之經也為三陽之首故先受病其脉絡於腰脊主於頭項故得病一日而頭項背膊腰脊痛也

傷寒二日候

傷寒二日陽明受病陽明胃之經也主於肌肉其脉絡鼻入目故得病二日肉熱鼻乾不得眠也諸陽在表表始受病在皮膚之間可摩膏火灸發汗而愈

傷寒三日候

傷寒三日少陽受病少陽者膽之經也其脉循於脇上於頸耳故得病三日胸脇熱而耳聾也三陽經絡始相傳病未入於臟故皆可汗而解

傷寒四日候

傷寒四日太陰受病太陰者脾之經也為三陰之首是故三日已前陽受病訖傳之於陰而太陰受病焉其脉絡於脾主於喉嗌故得病四日腹滿而嗌乾也其病在

胸膈故可吐而愈

傷寒五日候

傷寒五日少陰受病少陰者腎之經也其脉貫腎絡肺繫於舌故得病五日口熱舌乾渴而引飲也其病在腹故可下而愈

傷寒六日候

傷寒六日厥陰受病厥陰者肝之經也其脉循陰器絡於肝故得病六日煩滿而囊縮也此則陰陽俱受病毒

氣在胃故可下而愈

傷寒七日候

傷寒七日病法當小愈陰陽諸經傳病竟故也今七日已後病又甚者欲為再經病也再經病者是陰陽諸經絡重受病故也

傷寒八日候

傷寒八日病不解者或是諸陰陽經絡重受於病或因發汗吐下之後毒氣未盡所以病證猶有也

傷寒九日已上候

傷寒九日已上病不除者或初一經受病即不能相傳或已傳三陽訖而不能傳於陰致停滯累日病證不罷者或三陽三陰傳病已竟又重感於寒名為兩感傷寒則腑臟俱病故日數多而病候改變

傷寒咽喉痛候

傷寒病過經而不愈脉反沈遲手足厥逆者此為下部脉不至陰陽隔絕邪客於足少陰之絡毒氣上熏故咽

喉不利或痛而生瘡

傷寒斑瘡候

傷寒病證在表或未發汗或經發汗未解或吐下後而熱不除此毒氣盛故也毒既未散而表已虛熱毒乘虛出於皮膚所以發斑瘡隱軫如錦文重者喉口身體皆成瘡也

傷寒口瘡候

夫傷寒冬時發其汗必吐利口中爛生瘡以其表裏俱

金匱要略卷七
虛熱熱不已毒氣熏上焦故也

傷寒登豆瘡候

傷寒熱毒氣盛多發皰瘡其瘡色白或赤發於皮膚頭
作癰漿戴白膿者其毒則輕有紫黑色作根隱隱在肌
肉裏其毒重甚者五內七竅皆有瘡其瘡形如登豆故
以名焉

傷寒登豆瘡後滅瘢候

傷寒病發瘡者皆是熱毒所為其病折則瘡愈而毒氣

尚未全散故瘡痂雖落其癰猶壓或凹凸肉起所以宜用消毒滅癰之藥以傳之

傷寒謬語候

傷寒四五日脉沈而喘滿者沈為在裏而發汗其津液越出大便為難表虛裏實久久則譫語發汗後重發其汗亡陽譫語其脉反和者不死陽明病下血而譫語者此為熱入血室但頭汗出當刺期門穴隨其實者而瀉之澱然汗出者則愈病若譫言妄語身當有熱脉當洪

大而反手足四厥脉反沈細而微者死病也讖言妄語
身熱脉洪大者生沈細微手足四逆者死

傷寒煩候

此由陰氣少陽氣勝故熱而煩滿也少陰病惡寒而拳
時自煩欲去其衣被者可治也病脉已解而反發煩者
病新瘥又強與穀脾胃氣尚弱不能消穀故令微煩損
穀即愈少陰病脉微細而沈但欲卧汗出不煩欲自吐
五六日自利後煩躁不得卧寐者死發汗後下之脉平

而小煩此新虛不勝穀氣故也

傷寒虛煩候

傷寒發汗吐下已後腑臟俱虛而熱氣不散故虛煩也

傷寒煩悶候

傷寒毒氣攻胃故煩悶或服藥已後表不解心下有水氣其人微嘔熱滿而煩悶也

傷寒渴候

傷寒渴者由熱氣入於臟流於少陰之經少陰主腎腎

惡燥故渴而引飲

傷寒嘔候

傷寒陽明病熱入胃與穀氣并故令嘔或已經吐下虛熱在臟必飲水水入則胃家虛冷亦嘔也傷寒發熱無汗嘔不能食而反汗出濇然是為轉在陽明傷寒嘔多雖有陽明證不可攻也少陰病下利脉微澀者即嘔汗者必數更衣反少當溫其上灸其厥陰渴欲飲水者與之愈

傷寒乾嘔候

此謂熱氣在於脾胃也或發汗解後胃中不和尚有蓄熱熱氣上熏則心下否結故乾嘔

傷寒吐逆候

傷寒少陰病其人飲食入則吐或心中溫溫欲吐不能當遂吐之若始得之手足寒脉弦遲此中有寒飲不可吐也當溫之病人脉數數為有熱當消穀引食反吐者師發其汗陽微禹氣虛脉則為數數為客陽不能消穀

胃中虛冷故也

傷寒噦候

傷寒大吐下之後極虛復虛極其水鬱以發其汗者因得噦所以然者背寒中冷故也傷寒噦而滿者視其前後知何部不利利之即愈陽明病能食下之不解其人不能食攻其熱必噦所以噦者胃中虛冷故也又病人本虛伏熱在胃則胸滿胸滿則氣逆氣逆不可攻其熱攻其熱必噦

傷寒喘候

傷寒太陽病下之微喘者外未解故也夫發汗後飲水者必喘以水停心下腎氣乘心故喘也以水灌之亦令喘也

傷寒厥候

厥者逆也逆者謂手足逆冷也此由陽氣暴衰陰氣獨盛陰勝於陽故陽脉為之逆不通於手足所以逆冷也傷寒一日至四五日厥者必發熱前發熱者後必厥厥

深熱亦深厥微熱亦微厥下之發其汗者口傷爛赤傷寒先厥發熱下利必自止而反汗出必咽喉中強痛甚為喉痺發熱無汗而利必自止不止便膿血便膿血者其喉不痺傷寒先厥者不可下之發熱而利者必止見厥復利傷寒病厥五日熱亦五日設六日當復厥不厥之者自愈厥不過熱五日故知愈也發熱而厥七日而下利者為難治其脉從手足厥逆者可灸之下利手足厥無脉灸之不溫反微喘者死下利厥煩躁不能卧者

死病六七日其脉數手足厥煩躁陰厥不還者死發熱下利至厥不止者死下利後其脉絕手足厥卒時脉還手足溫者為生不還者死

傷寒悸候

悸者動也謂心下悸動也此由傷寒病發汗已後因又下之內有虛熱則渴渴則飲水水氣乘心必振寒而心下悸也太陽病小便不利者為多飲水心下必悸小便少者必苦裏急失脉浮數法當汗出而愈而下之身體

重心悸不可發汗當自汗出而解所以然者尺中微裏
虛表實津液自和便自汗出愈也

傷寒瘧候

瘧之為狀身熱足寒項頸強惡寒時頭熱面目熱搖頭
卒口噤背直身體反張是也此由肺移熱於腎傳而為
瘧瘧有剛柔太陽病發熱無汗而反惡寒為剛瘧發熱
汗出而惡寒為柔瘧診其脉沈細此為瘧也


傷寒心否候

太陽少陰并病脉數緊而下之緊反入裏則作否否者
心下滿也病發於陰者不可下下之則心下否按之自
硬但氣否耳不可復下也若熱毒氣乘心心下否滿面
赤目黃狂言恍惚者此為有實宜速吐下之

傷寒結胸候

結胸者謂熱毒結聚於心胸也此由病發於陽而早下
之熱氣乘虛而否結不散也按之痛其脉寸口浮關上
反自沈是也脉大不可下下之即死脉浮而大下之為

逆若陽脉浮關上細沈緊而飲食如故時小便利者名
為臟結臟結病舌上白胎滑為難治不往來寒熱其人
反靜舌上不胎者不可攻之



巢氏諸病源候總論卷七

欽定四庫全書

子部

巢氏諸病源候總論卷八

十至

詳校官太醫院醫官_臣姜晟

編修_臣倉聖脉覆勘

總校官庶吉士_臣何思鈞

校對官中書_臣吳俊

謄錄舉人_臣楊兆豐

欽定四庫全書

巢氏諸病源候總論卷八

隋巢元方撰

傷寒病諸候下凡四十四論

傷寒餘熱候

傷寒病其人或未發汗吐下或經服藥已後而脉洪大實數腹內脹滿小便赤黃大便秘難或煩或渴面色變赤此為腑臟有結熱故也

傷寒五臟熱候

傷寒病其人先苦身熱噤乾而渴飲水即心下滿洒淅
身熱不得汗惡風時欬逆者此肺熱也若其人先苦身
熱噤乾而小腹繞臍痛腹下滿狂言默默惡風欲嘔者
此肝熱也若其人先苦手掌心熱煩心欲嘔身熱心下
滿口乾不能多飲目黃汗不出欲得寒水時妄笑者此
心熱也若其人先苦身熱四肢不舉足脛寒腹滿欲嘔
而泄惡聞食臭者此脾熱也若其人先苦噤乾內熱連

足脛腹滿大便難小便赤黃腰脊痛者此腎熱也

傷寒變成黃候

陽明病無汗小便不利心中懊憹必發黃若被火額上微汗出而但小便不利亦發黃其人狀變黃如橘色或如桃枝色腹微滿此由寒濕氣不散瘀熱在於脾胃故也

傷寒心腹脹滿痛候

此由其人先患冷癖因發熱病服冷藥及飲冷水結在

心下此為臟虛動於舊癖故也或吐下已後病不解內
外有熱故心腹脹滿痛此為有實也

傷寒宿食不消候

此謂被下後六七日不大便煩熱不解腹滿而痛此為
胃內有乾糞挾宿食故也或先患寒癖因有宿食又感
於傷寒熱氣相搏故宿食不消

傷寒大便不通候

傷寒陽脉微而汗出少為自始汗出多為太過陽明脉

實因發其汗汗出多者亦為太過太過者陽氣絕於裏則津液竭熱結在內故大便牢而不通也

傷寒小便不通候

傷寒發汗後而汗出不止津液少胃內極乾小腸有伏熱故小便不通

傷寒熱毒利候

此由表實裏虛熱氣乘虛而入攻於腸胃則下黃赤汁此熱毒所為也

傷寒膿血利候

此由熱毒傷於腸胃故下膿血如魚腦或如爛肉汁壯熱而腸痛此濕毒氣盛故也

傷寒利候

傷寒病若表實裏虛熱乘虛而入攻於腸胃則下黃赤汁若濕毒氣盛則腹痛壯熱下膿血如魚腦如爛肉汁若寒毒入胃則腹滿身熱下清下清者不可攻其表汗出必脹滿表裏俱虛故也傷寒六七日不利更發熱而

利者其人汗出不止者死但有陰無陽故也下利有微熱其人渴脉弱者今自愈脉沈弱弦者下重其脉大者為未止脉微數者為欲自止雖發熱不死少陰病八九日而身手足盡熱熱在膀胱必便血下利脉浮數尺中自滑其人必清膿血若利止惡寒而拳手足溫者可治也陽明病下利其脉浮大此皆為虛弱強下之故傷寒下利日十餘行其脉反實死

傷寒病後胃氣不和利候

此由初受病時毒熱氣盛多服冷藥以自瀉下病折已後熱勢既退冷氣乃動故使心下愒牢噫噦食臭腹內雷鳴而泄利此由脾胃氣虛冷故也

傷寒上氣候

此由寒毒氣傷於太陰經也太陰者肺也肺主氣肺虛為邪熱所客客則脹脹則上氣也

傷寒欬嗽候

此由邪熱客於肺也上焦有熱其人必飲水水停心下

則肺為之浮肺主於欬水氣乘之故欬嗽

傷寒衄血候

傷寒病血衄者此由五臟熱結所為也心主於血肝藏於血熱邪傷於心肝故衄血也衄者鼻血出也肺主於氣而開竅於鼻血隨氣行所以從鼻出陽明病口燥但欲漱水不欲咽者必衄衄家不可攻其表汗出額上蒸急而緊直視而不能眴不得眠亡血不可攻其表汗出則寒慄而振脈浮緊發熱其身無汗自衄者愈

傷寒吐血候

此由諸陽受邪熱初在表應發汗而汗不發致使熱毒入深結於五臟內有瘀積故吐血

傷寒陰陽毒候

夫欲辯陰陽毒病者始得病時可看手足指冷者是陰不冷者是陽若冷至一二三寸者病微若至肘膝為病極過此難治陰陽毒病無常也或初得病便有毒或服湯藥經五六日以上或十餘日後不瘥變成毒者其候

身重背強咽喉痛糜粥不下毒氣攻心心腹煩痛短氣
四肢厥逆嘔吐體如被打發斑此皆其候重過三日則
難治陽毒者面目赤或便膿血陰毒者面目青而體冷
若發赤斑十生一死若發黑斑十死一生陽毒為病面
目斑斑如錦紋咽喉痛清便膿血七日不治五日可治
九日死十一日亦死

壞傷寒候

此謂得病十二日已上六經俱受病訖或已發汗吐下

而病證不解邪熱留於腑臟致令病候多變故曰壞傷
寒本太陽病不解轉入少陽脇下牢滿乾嘔不能食往
來寒熱尚未吐下其脉沈緊與小柴胡湯若已吐下發
汗飲柴胡證罷此為壞病知犯何逆以法治之寸口脉
洪而大數而滑洪大榮氣長滑數胃氣實榮長陽即盛
鬱怫不得出胃實即牢大便難即乾燥三焦閉塞津液
不通醫已發陽氣盛不用復重下之胃燥畜大便遂儼
小便不利榮衛相搏煩心發熱兩目如火鼻乾面正赤

舌燥齒黃焦故大渴過經成壞病

傷寒百合候

百合病者謂無經絡百脉一宗悉致病也多因傷寒虛勞大病之後不平復變成斯疾也其狀意欲食復不能食常默默欲得卧復不得卧欲出行復不能行飲食或有美時或有不用飲時如強健人而卧不能行如有寒復如無寒如有熱復如無熱若小便赤黃百合之病諸藥不能治得藥即劇吐利如有神靈者身形如和其人

脉微數每尿輒頭痛其病六十日不愈若尿頭不痛漸
漸然者四十日愈若尿快然但眩者二十日愈體證或
未病而預見或病四五日而出或病二十日一月微見
其狀惡寒而嘔者病在上焦也二十三日當愈其狀腹
滿微喘大便鞞三四日一大便時復小溏者病在中焦
也六十三日當愈其狀小便淋瀝難者病在下焦也四
十三日當愈各隨其證以治之耳

傷寒狐惑候

夫狐惑二病者是喉陰之為病也初得狀如傷寒或因傷寒而變成斯病其狀默默欲卧目攣不得卧卧起不安蟲食於喉咽為惑食於陰肛為狐惡飲食不欲聞食臭其人面目翕赤翕黑翕白食於上部其聲啞食於下部其咽乾此皆由濕毒氣所為也

傷寒濕匿候

凡得傷寒時氣熱病腹內有熱又人食少腸胃空虛三蟲行作求食食人五臟及下部匿病之候齒無色舌上

盡白甚者脣裏有瘡四肢沈重忽忽喜眠如此皆為蟲食其肛肛亂見五臟即死當數看其上脣內有瘡唾血脣內如粟瘡者則心內懊懣痛此蟲在上食其五臟下脣內生瘡者其人不寤此蟲食下部皆能殺人

傷寒下部痛候

此由大腸偏虛毒氣衝於肛門故下部卒痛甚者痛如鳥啄

傷寒病後熱不除候

此謂病已間五臟尚虛客邪未散真氣不復故旦暮猶有餘熱如瘧狀此非真實但客熱也

傷寒病後渴候

此謂經發汗吐下已後腑臟空虛津液竭絕腎家有餘熱故渴

傷寒病後不得眠候

夫衛氣晝行於陽夜行於陰陰主夜夜主卧謂陽氣盡陰氣盛則目瞑失令熱氣未散與諸陽并所以陽獨盛

陰偏虛雖復病後仍不得眠者陰氣未復於本故也

傷寒病後虛羸候

其人血氣先虛復為虛邪所中發汗吐下之後經絡損傷陰陽竭絕熱邪始散真氣尚少五臟猶虛穀神未復無津液以榮養故虛羸而生病焉

傷寒病後不能食候

此由陽明太陰受病被下之後其熱已除而脾胃為之虛冷穀氣未復故不能食也

傷寒病後虛汗候

夫諸陽在表陽氣虛則自汗心主於汗心臟偏虛故其液妄出也

傷寒內有瘀血候

夫人先瘀結在內因傷寒病若熱搏於久瘀則發熱如狂若有寒則小腹滿小便反利此為血瘀宜下之其脉沈結者血證諦也

傷寒毒攻眼候

肝開竅於目肝氣虛熱乘虛上衝於目故目赤痛重者
生瘡翳白膜息肉

傷寒毒攻足候

此由熱毒氣從內而出循經絡攻於足也人五臟六腑
并榮俞皆出於手足指故毒從臟腑而出

傷寒毒流腫候

人陰陽俱虛濕毒氣與風熱相搏則榮衛澀榮衛澀則
血氣不散血氣不散則邪熱致壅隨其經絡所生而流

腫也

傷寒病後脚氣候

此謂風毒濕氣滯於腎經腎主腰脚今腎既濕故脚弱而腫其人小腸有餘熱即小便不利則氣上脚弱而氣上故為脚氣也

傷寒病後霍亂候

霍亂吐下利止後更發熱傷寒其脉微澀本是霍亂今是傷寒却四五日至陰經上轉入陰當利本素嘔下利

者不治若其人即欲大便但反失氣而不利是為更屬陽明心強二十二日愈所以然者經竟故也下後當強強能食者愈今反不能食到後經中頗能食復一經能食過之一日當愈若不愈者不屬陽明也惡寒脉微而後利利止必亡血

傷寒病後瘧候

病後邪氣未散陰陽尚虛因為勞事致二氣交爭陰勝則發寒陽勝則發熱故寒熱往來有時休作而成瘧也

傷寒病後渴利候

此謂大渴飲水而小便多也其人先患勞損大病之後腎氣虛則熱熱乘之則腎燥腎燥則渴渴則引水腎虛則不能制水故飲水數升小便亦數升名曰渴利也

傷寒肺痿候

大發汗後因復下之則亡津液而小便反利者此為上虛不能制於下也虛邪中於肺肺痿之病也欲欬而不能唾濁涎沫此為肺痿之病也

傷寒失聲候

邪客於肺肺主聲而通於氣今外邪與真氣相搏真氣虛而邪氣勝故聲為之不通也

傷寒夢泄精候

邪熱乘於腎則陰氣虛陰氣虛則夢交通腎藏精今腎虛不能制於精故因夢而泄

傷寒勞復候

傷寒病新瘥津液未復血氣尚虛若勞動早更復成病

故勞復也若言語思慮則勞神梳頭澡洗則勞力勞則生熱熱氣乘虛還入經絡故復病也其脉緊者宜下之

傷寒病後食復候

傷寒病新瘥及大病之後脾胃尚虛穀氣未復若食猪肉腸血肥魚及久膩物必大下利醫所不能治也必至於死若食餅糲黍飴脯炙鱠棗栗諸菓脯物及牢強難消之物胃氣虛弱不能消化必更結熱適以藥下之則胃虛冷大利難禁不可下之必死下之亦危皆難救也

大病之後多坐此死不慎護也夫病之新瘥後但得食糜粥寧少食忍飢慎勿飽不得他有所食雖思之勿與引日轉久可漸食羊肉糜若羹慎不可食猪狗等肉

傷寒病後令不復候

傷寒病後多因勞動不節飲食過度更發於病名之為復復者謂復病如初也此由經絡尚虛血氣未實更致於病耳令預服藥及為方法以防之故云令不復也

傷寒陰陽易候

陰陽易病者是男子婦人傷寒病新瘥未平復而與之交
接得病者名為陰陽易也其男子病新瘥未平復而
婦人與之交接得病者名陽易其婦人得病新瘥未平
復而男子與之交接得病者名陰易若二男一女並不
相易所以呼為易者陰陽相感動其毒度着如人之換
易也其得病之狀身體熱衝胸頭重不能舉眼內生眵
四肢拘急小腹疝痛手足拳皆即死其亦有不即死者
病苦小腹裏急熱上衝胸頭重不欲舉百節解離經脉

緩弱氣血虛骨髓空竭便怏怏吸吸氣力轉少著牀不能搖動起居仰人或引歲月方死

傷寒交接勞復候

夫傷寒病新瘥未滿百日氣力未平復而以房室者畧無不死也有得此病愈後六十日其人已能行射獵因而房室即吐涎而死病雖云瘥若未平復不可交接必小腹急痛手足拘拳二時之間亡范汪方云故督郵顧子獻得病已瘥未健詣華專視脉專曰雖瘥尚虛未平

復陽氣不足勿為勞事也能勞尚可女勞即死臨死當吐舌數寸獻婦聞其瘥從百餘里來省之住數宿止交接之間三日死婦人傷寒雖瘥未滿百日氣血骨髓未牢實而合陰陽快者當時乃未即覺惡經日則令百節解離經絡緩弱氣血虛骨髓空竭便怱怱吸吸氣力不足著牀不能動搖起居仰人食如故是其證也丈夫亦然其新瘥虛熱未除而快意交接者皆即死若瘥後與童男交接者多不發復復者亦不必死

傷寒今不相染易候

傷寒之病但人有自觸冒寒毒之氣生病者此則不染
着他人若因歲時不和溫涼失節人感其乖戾之氣而
發病者此則多相染易故須預服藥及為方法以防之

巢氏諸病源候總論卷八

欽定四庫全書

巢氏諸病源候總論卷九

隋 巢元方 撰

時氣病諸候

凡四十三論

時氣候

時行病者是春時應暖而反寒夏時應熱而反冷秋時應涼而反熱冬時應寒而反溫非其時而有其氣是以一歲之中病無長少率相似者此則時行之氣也從春

分後其中無暴大寒不冰雪而人有壯熱為病者此則屬春時陽氣發於冬時伏寒變為溫病也從春分以後至秋分節前天有暴寒者皆為時行寒疫也一名時行傷寒此是節候有寒傷於人非觸冒之過也若三月四月有暴寒其時陽氣尚弱為寒所折病熱猶小輕也五月六月陽氣已盛為寒所折病熱則重也七月八月陽氣已衰為寒所折病熱亦小微也其病與溫及暑病相似但治有殊耳然得時病一日在皮毛當摩膏火灸愈

不解者二日法針服行解散汗出愈不解三日復發汗
若大汗即愈不解止勿復發汗也四日服藜蘆丸微吐
愈若病固藜蘆丸不吐者服赤豆瓜蒂散吐已解視病
者尚未了了者復一法針之當解不愈者六日熱已入
胃乃與鷄子湯下之愈百無不如意但當諦視節度與
病耳食不消病亦如時行俱發熱頭痛食病當速下之
時病當待六七日下之時病始得一日在皮二日在膚
三日在肌四日在胸五日入胃入胃乃可下也熱在胃

外而下之熱乘虛便入胃然病要當復下之不得下胃中餘熱置此為病二死一生此輩不愈胃虛熱入胃爛微者赤斑出五死一生劇者黑斑出十死一生病人有強弱相信也若得病無熱但狂言煩躁不安精神語言與人不相主當者勿以火迫但以猪苓散一方寸匕已上飲之以一升若升半水可至二升益佳當以新汲井水強令飲之以指刺喉中吐之隨手愈不時吐者此病皆多不瘥勿以餘藥治也不相主當必危若此病不時

以猪苓散吐解之者其殆速死亦可先以法針之尤佳
以病者過日不以時得下之熱不得泄亦胃爛矣其湯
熨針石別有正方補養宣導今附於後

養生方導引法云清旦初起以左右手交互從頭上挽
兩耳舉又引鬢髮即流通令頭不白耳不聾又摩手掌
令熱以摩面從上下二七正去肝氣令面有光又摩手
令熱從體上下名曰乾浴令人勝風寒時氣寒熱
頭痛百病皆愈

時氣一日候

時氣病一日太陽受病太陽為三陽之首主於頭項故
得病一日頭項腰痛

時氣二日候

時氣病二日陽明受病陽明主於肌肉其脈絡鼻入目
故病二日內熱鼻乾不得眠夫諸陽在表始受病故可
摩膏火灸發汗而愈

時氣三日候

時氣病三日少陽受病少陽脈循於脇上於頸耳故得病三日胸脅熱而耳聾也三陽經絡始相傳病未入於藏故可汗而愈

時氣四日候

時氣病四日太陰受病太陰為三陰之首三日已後諸陽受病訖即傳之於陰太陰之脈主於喉嗌故得病四日腹滿而嗌乾其病在胸膈故可吐而愈也

時氣五日候

時氣病五日少陰受病少陰脈貫腎絡肺系於舌故得病五日口熱舌乾而引飲其病在腹故可下而愈

時氣六日候

時氣病六日厥陰受病厥陰脈循陰器絡於肝故得病六日煩滿而陰縮此為三陰三陽俱受病毒氣入於腸胃故可下而愈

時氣七日候

時氣病七日法當小愈所以然者陰陽諸經傳病竟故

也今病不除者欲為再經病也再經病者謂經絡重受病也

時氣八九日已上候

時氣病八九日已上不解者或是諸經絡重受於病或已發汗吐下之後毒氣未盡所以病不能除或一經受病未即相傳致使停滯累日病證不改者故皆當察其證候而治之

時氣取吐候

夫得病四日毒在胸膈故宜取吐有得病二三日便心
胸煩滿此為毒氣已入或有五六日已上毒氣猶在上
焦者其人有痰實故也所以復宜取吐也

時氣煩候

夫時氣病陰氣少陽氣多故身熱而煩其毒氣在於心
而煩者則令人悶而欲嘔若其人胃內有燥糞而煩者
則謬語時繞臍痛腹為之滿皆當察其証候也

時氣狂言候

夫病甚則棄衣而走登高而歌或至不食數日踰垣上屋所上非其素時所能也病反能者皆陰陽爭而外并於陽四肢者諸陽之本也邪盛則四支實實則能登高而歌熱盛於身故棄衣而走陽盛故妄言罵詈不避親戚大熱遍身狂言而妄見妄聞之

時氣嘔候

胃家有熱穀氣入胃與熱相并氣逆則嘔或吐下後飲食多胃虛冷亦為嘔也

時氣乾嘔候

熱氣在於脾胃或發汗解後或大下之後胃內不和尚有蓄熱熱氣上薰故心煩而嘔也

時氣噦候

伏熱在胃令人胸滿則氣逆氣逆則噦若大下後胃氣虛冷亦令致噦也

時氣嗽候

熱邪客於肺上焦有熱其人必飲水水停心下則上乘

於肺故上氣而嗽也

時氣渴候

熱氣入於胃藏腎惡燥熱氣盛則腎燥腎燥故渴而引飲也

時氣衄血候

時氣衄血者五臟熱結所為心主於血邪熱中於手少陰之經客於足陽明之絡故衄血也衄血者血從鼻出也

時氣吐血候

諸陽受病不發其汗熱毒入深結在五臟內有瘀血積故令吐血也

時氣口瘡候

發汗下後表裏俱虛而毒氣未盡熏於上焦故喉口生瘡也

時氣喉咽痛候

陰陽隔絕邪客於足少陰之絡毒氣上熏攻於咽喉故

痛或生瘡也

時氣發斑候

夫熱病在表已發汗未解或吐下後熱毒氣不散煩躁
謬言語此為表虛裏實熱氣躁於外故身體發斑如錦
文凡發斑不可用發表藥令瘡開泄更增斑爛表虛故
也

時氣毒攻眼候

肝開竅於目肝氣虛熱毒乘虛上衝於目故赤痛或生

腎赤白膜息肉及瘡也

時氣毒攻手足候

熱毒氣從臟腑出攻於手足手足則焮熱赤腫疼痛也人五臟六腑并榮俞皆出於手足指故此毒從內而出也

時氣胞瘡候

夫表虛裏實熱毒內盛則多發胞瘡重者周布遍身其狀如火瘡若根赤頭白者則毒輕若色紫黑則毒重其

瘡形如登豆亦名登豆瘡

時氣瘡瘡候

夫病新瘥血氣未復皮膚尚虛疎而觸冒風日則偏體起細瘡瘙痒如癬疥狀名為逸風

時氣蠱候

毒氣結在腹內穀氣衰毒氣盛三蟲動作食人五臟多令洩利下部瘡痒若脣内生瘡但欲寐者此蟲食下部也重者肛爛見五臟也

時氣熱利候

此由熱氣在於腹胃挾毒則下黃赤汁也

時氣膿血利候

此由熱傷於腸胃故下膿血如魚腦或如爛肉汁壯熱而腹疔痛此濕毒氣所為也

時氣蠶利候

夫熱蓄在臟多令人下利若毒氣盛則變膿血因而成蠶蠶者蟲食人五臟及下部也若食下部則令穀道生

瘡而下利名為蜜利若但生瘡而不利者為蜜也

時氣大便不通候

此由脾胃有熱發汗太過則津液竭津液竭則胃乾結熱在內大便不通也

時氣小便不通候

此由汗後津液虛少其人小腸有伏熱故小便不通也

時氣陰陽毒候

此謂陰陽二氣偏虛則受於毒若病身重腰脊痛煩悶

面赤斑出咽喉痛或下利狂走此為陽毒若身重背強短氣嘔逆脣青面黑四支逆冷為陰毒或得病數日變成毒者或初得病便有毒者皆宜依證急治失候則殺人

時氣變成黃候

夫時氣病濕毒氣盛蓄於脾胃脾胃有熱則新穀鬱蒸不能消化大小便結澀故令身面變黃或如橘柚或如桃枝色

時氣變成瘧候

病後邪氣未散陰陽尚虛因為勞事致二氣交爭陰勝則發寒陽勝則發熱故令寒熱往來有時休作而成瘧時氣敗候

此謂病後餘毒未盡形証變轉久而不瘥陰陽無復綱紀名為敗病

時氣勞復候

夫病新瘥者血氣尚虛津液未復因即勞動更成病焉

若言語思慮則勞於神梳頭澡洗則勞於力未堪勞而強勞之則生熱熱氣還經絡復為病者名曰勞復

時氣食復候

夫病新瘥者脾胃尚虛穀氣未復若即食肥肉魚鱠餅餌棗栗之屬則未能消化停積在於腸胃使脹滿結實因更發熱復為病者名曰食復也

時氣病瘥後交接勞復候

夫病新瘥者陰陽二氣未和早合房室則令人陰腫於

腹腹內疴痛名為交接勞復

時氣病後陰陽易候

陰陽易病者是男子婦人時氣病新瘥未平復而與之交
交接得病者名陰陽易也其男子病新瘥未平復而婦
人與之交交接得病者名曰陽易其婦人得病新瘥未平
復而男子與之交交接者得病名曰陰易若二男二女並
不相易所以呼為易者陰陽相感動其毒度著於人如
換易也其病之狀身體熱衝胸頭重不能舉眼中生眵

四支拘急小腹疔痛手足拳皆即死其亦有不即死者
病苦小腹裏急熱氣上衝胸頭重不欲舉百節解離經
脈緩弱氣血虛骨髓竭便怱怱吸吸氣力轉少著牀不
能搖動起居仰人或引歲月方死

時氣病後虛羸候

夫人榮衛先虛復為邪熱所中發汗吐下之後經絡損
傷陰陽竭絕虛邪始散真氣尚少五臟猶虛穀神未復
無津液以榮養故虛羸而生衆病焉

時氣陰莖腫候

此由腎藏虛所致腎氣通於陰今腎為熱邪所傷毒氣下流故令陰腫

時氣令不相染易候

夫時氣病者此皆因歲時不和溫涼失節人感乖戾之氣而生病者多相染易故預服藥及為方法以防之

熱病諸候 凡二十八論

熱病候

熱病者傷寒之類也冬傷於寒至春變為溫病夏變為暑病暑病者熱重於溫也肝熱病者小便先黃腹痛多卧身熱熱爭則狂言及驚脇滿痛手足躁不安卧庚辛甚甲乙大汗氣逆則庚辛死心熱病者先不樂數日乃熱熱爭則卒心痛煩冤善嘔頭痛面赤無汗至壬癸甚丙丁大汗氣逆則壬癸死脾熱病者先頭重頰痛煩心欲嘔身熱熱爭則腰痛腹滿泄兩頷痛甲乙甚戊己大汗氣逆則甲乙死肺熱病者先淅然起毛惡風舌上黃

身熱熱爭則喘欬痺走胸應背不得大息頭痛不甚汗
出而寒丙丁甚庚辛大汗氣逆則丙丁死腎熱病者先
腰痛脛酸苦渴數飲身熱熱爭則項痛而強脛寒骨且
酸足下熱不欲言其項痛淖澹戊己甚壬癸大汗氣逆
則戊己死肝熱病者左頰先赤心赤病者額先赤脾熱
病者鼻先赤肺熱病者右頰先赤腎熱病者頤先赤凡
病雖未發見其赤色者刺之名曰治未病一日汗不出
大瀉發者死二日泄而腹滿甚者死三日目不明熱不

已者死四日老人嬰兒熱而腹滿者死五日汗不出嘔
血者死六日舌本爛熱不已者死七日欬血衄血汗不
出出不至足者死八日髓熱者死九日熱而瘕者死凡
此者不可刺也熱病已得汗而脈尚躁盛此陰脈之極
也死其得汗而脈靜者生熱病者脈常躁盛而不得汗
者此陽脈之極也死脈盛躁得汗者生熱病七八日脈
微小病者溲血口中乾一日半死脈代一日死熱病已
得汗脈尚數躁而喘且復熱勿庸刺喘甚者死熱病七

八日脈不躁躁不數後三日中有汗三日不汗四日死
未嘗汗者勿庸刺也診人熱病七八日其脈微小口乾
脈代舌焦黑者死診人熱病七八日脈不數不喘者當
瘖之後三日溫汗不出者死熱病已得汗當熱不去者
亦死不治也脈靜安者生脈躁者難治脈常躁靜此氣
之極亦死也腹鞞常喘而熱不退者死多汗脈虛小者
生鞞實者死養生方云三月勿食陳薑必遭熱病

熱病一日候

熱病一日病在太陽太陽主表表謂皮膚也病在皮膚之間故頭項腰脊疼痛

熱病二日候

熱病二日陽明受病病在肌肉故肉熱鼻乾不得眠故可摩膏火灸發汗而愈

熱病三日候

熱病三日諸陽相傳病訖病猶在表未入於臟故胸脇熱而且聾故可發汗而愈

熱病四日候

熱病四日太陰受病太陰者三陰之首也三陽受病訖傳入於陰故毒氣已入胸膈其病喉乾腹滿故可吐而愈

熱病五日候

熱病五日少陰受病毒氣入腹內其病口舌乾而引飲故下而愈

熱病六日候

熱病六日厥陰受病毒氣入腸胃其人煩滿而陰縮故可下而愈

熱病七日候

熱病七日三陰三陽傳病訖病法當愈今病不除者欲為再經病也再經者謂經絡重受病也

熱病八九日已上候

熱病八九日已上不解者皆由毒氣未盡所以病證不除也

熱病解肌發汗候

此謂得病三日以還病法在表故宜發汗或病已經五
六日然其人喉口不焦乾心腹不滿又不引飲但頭痛
身體壯熱脈洪大者此為病證在表未入於藏故雖五
六日猶須解肌發汗不可苟依日數輒取吐下

熱病煩候

此由陽勝於陰熱氣獨盛否結於藏則三焦隔絕故身
熱而煩也

熱病胞瘡候

夫熱病胞瘡者此由表虛裏實熱氣盛則發瘡重者周布徧身若瘡色赤頭白則毒輕色紫黑則毒重其形如登豆故名登豆瘡

熱病斑瘡候

夫病在表或未發汗或已發汗吐下後表證未解毒氣不散煩熱而渴渴而不能飲表虛裏實故身體發斑如

錦文

熱病熱瘡候

人藏府虛實不調則生於客熱表有風濕與熱氣相搏則身體生瘡痒痛而膿汁出甚者一瘥一劇此風熱所為也

熱病口瘡候

此由脾藏有熱衝於上焦故口生瘡也

熱病咽喉瘡候

上實下虛熱氣內盛熏於咽喉故生瘡也

熱病大便不通候

夫經發汗汗出多則津液少津液少則胃乾結熱在胃所以大便不通又有府藏自生於熱者此由三焦否隔脾胃不和蓄熱在內亦大便不通也

熱病小便不通候

熱在膀胱流於小腸熱盛則脾胃乾津液少故小便不通也

熱病下利候

熱氣攻於腸胃胃虛則下赤黃汁挾毒則成膿血

熱病蜜候

熱氣攻於腸胃則穀氣衰所以三蟲動作食人五臟及下部重者肛爛見府藏

熱病毒攻眼候

肝臟開竅於目肝氣虛熱毒乘虛則上衝於目重者生瘡瞖及赤白膜也

熱病毒攻手足候

夫熱病攻手足及人五藏六府并榮俞皆出於手足指
今毒氣從府藏而出循於經絡攻於手足故手足指皆
腫亦炊痛也

熱病嘔候

胃內有熱則穀氣不和新穀入胃與熱氣相搏胃氣不
平故嘔或吐下已後臟虛亦令嘔也

熱病噦候

伏熱在胃則令人胸滿胸滿則氣逆氣逆則噦也若大

下已後飲水多胃內虛冷亦令噦也

熱病口乾候

此由五藏有虛熱脾胃不和津液竭少故口乾也

熱病衄候

心臟傷熱所為也心主血肺主氣開竅於鼻邪熱與血氣并故衄也衄者血從鼻出也

熱病勞復候

夫熱病新瘥津液未復血氣尚虛因勞動早勞則生熱

熱氣乘虛還入經絡故復病也

熱病後沉滯候

凡病新瘥後食猪肉及腸血肥魚脂膩必大下利醫所不能復治也必至於死若食餅餌菜飴哺炙膾棗栗諸巢物脯及牢實難消之物胃氣尚虛弱不能消化必結熱復病還以藥下之

巢氏諸病源候總論卷九